

宋史新編

天文志
五行志

第六



			八	漢
			二	書
			九	門
六	一	二		
五	七			
		架	函	號
			類	

庫文閣內			
六	八		漢
函	二		書
一	九		
一	五		
	架	冊	號
			類

內閣文庫		
番號	漢	8829
冊數	65	(7)
函號	286	78



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak





宋史新編目錄合卷六

至五年

淺草文庫

卷十五

志

天文^上儀象

極度
刻漏

黃赤道
中星

卷十六

天文^下日食

日變
月輝氣

志二

日輝氣
月食

月紀
五緯相合

月紀
五緯俱見

五緯
太極

五緯
相紀

太白
畫經

老人星
畫見

卷十七

志三

宋史新編目錄合卷六

五行

上

水災
雪霜雹

河清
雷

醴泉
魚孽

恒寒
蝗

龍鬪

黑眚
馬妖

黑祥
人疴

水鬪
疫氣

天鳴

石隕
恒煥

草妖
禽妖

芝草
羊禍

火孽

鳳凰

血祥

嘉禾

卷十八

天文

志四

五行

下

瑞木
恒雨

木妖
甘露

木冰
服妖

狂咎
龜孽

雞禍

鼠妖
瑞石

鍾鼎錢印

白祥

恒賜

詩妖

訛讖

大饑

黃祥

恒風
土妖

華孽
地震

牛禍
山崩

宋史新編卷十五

志一

明南京戶部主事莆田柯維騏編

志

天文

上

自古聖王開物成務體國經野曷嘗不審於象緯吉凶哉是故有星官之書有璣衡之器有司天之職至周而制益備降及後代官非世掌然專門之業學士大夫至於草澤咸有傳者宋興竇儀楚昭輔號知天文太宗召試伎術隸司天而張思訓韓顯符輩相繼以所能進其後沈括之論議蘇頌之製作卓識巧思可謂度越諸家

宋史新編卷十五

矣女真入寇太史所藏書與器悉掠而北高宗南渡至
紹興十四年始重創渾儀然頌之舊法卒莫能復語曰
智者創物巧者述焉智巧之士豈恒見於天下邪宋兩
朝天文志所論三垣二十八部諸星去極入宿之度頗
詳中興志考訂亦甚悉二志今載於馬端臨通考其書
世多有之茲不槩錄錄其推步大較與占測之有徵者
兼采諸儒所記類附之示鑒戒焉彼歐陽脩唐書五代
史敘天文而削事應以矯漢儒災異之學然春秋二百
四十二年間仲尼所書天變果皆無徵乎秦政兼諸侯
彗星竟天項羽屠咸陽枉矢西流漢高得國五星聚東

井魏文受禪星孛貫北斗斯司馬遷諸人所述者又果
皆誣乎夫徵驗之說廢則不足畏之說興歐陽之論本
劉知幾殆矯枉過正耳

儀象

璿璣玉衡史謂起於帝嚳或謂作於宓犧又謂羲和舊
器非舜創為也漢洛下閎造太初曆用渾儀馬融謂即
古之璣衡宋王蕃之論亦云渾儀之制置天梁地平以
定天體為四游儀以綴赤道者璣也置望筒橫簫於游
儀中以窺七曜之行而知其躔離之次者衡也若六合
儀三辰儀與四游儀竝列為三重者唐李淳風所作而

黃道儀者一行所增也如張衡祖洛下閎耿壽昌之法別爲渾象寘諸密室用漏水轉之以合璿璣所加星度則渾儀之外又有渾象唐李淳風梁令瓚祖之始與渾儀並用太平興國中張思訓創作以獻太宗召工造於禁中踰年而成詔置於文明殿東鼓樓下其制起樓高丈餘機隱於內規天矩地下設地輪地足又爲橫輪側輪斜輪定身關中關小關天柱七直神左搖鈴右扣鍾中擊鼓以定刻數每一晝夜周而復始又以木爲十二神各直一時至其時則自執辰牌循環而出隨刻數以定晝夜短長上有天頂天牙天關天指天抱天束天條

布三百六十五度爲日月五星紫微宮別宿斗建黃赤道以日行度定寒暑進退開元遺法運轉以水至冬凝凍遲澀遂爲踈略寒暑無準今代以水銀則無差失又舊法日月晝夜行度皆人所運新制成於自然尤精妙以思訓爲司天渾儀永宣宗時司天冬官正韓顯符造銅候儀本淳風一行遺法上所著經十卷銅儀之制九曰雙規曰游規曰直規曰窺管曰平準曰黃道曰赤道曰龍柱曰水臬但游儀雙環夾望桶旋轉而黃赤道相固不動皇祐初又命日官舒易簡于淵周琮等參用淳風令瓚之制改鑄黃道渾儀帝製渾儀總要十卷論前

代得失熙寧七年沈括上渾儀浮漏景表三議渾儀議曰五星之行有疾舒日月之交有見匿求其次舍經曆之會其法一寓於日冬至之日日之端南者也日行周天而復集於表銳凡三百六十有五曰四分日之幾一而謂之歲周天之體日別之謂之度度之離其數有二日行則舒則疾會而均別之曰赤道之度日行自南而北升降四十有八度而迤別之曰黃道之度度不可見其可見者星也日月五星之所由有星焉當度之晝者凡二十有八而謂之舍舍所以潔度度所以生數也度在天者也爲之璣衡則度在器度在器則日月五星可

搏乎器中而天無所豫也天無所豫則在天者不爲難知也自漢以前爲曆者必有璣衡以自驗跡其後雖有璣衡而不爲曆作爲曆者亦不復以器自考氣朔星緯皆莫能知其必當之數至唐僧一行改大衍曆法始復用渾儀參實故其術所得比諸家爲多臣嘗歷考古今儀象之法虞書所謂璿璣玉衡唯鄭康成粗記其法至洛下閎製圓儀賈逵又加黃道其詳皆不存于書其後張衡爲銅儀於密室中以水轉之蓋所謂渾象非古之璣衡也吳孫氏時王蕃陸績皆嘗爲儀及象其說以謂舊以二分爲一度而患星辰稠糝張衡改用四分而復

推重難運故蕃以三分為度周丈有九寸五分寸之三而具黃赤道焉績之說以天形如鳥卵小橢而黃赤道短長相害不能應法至劉曜時南陽孔定製銅儀有雙規規正距子午以象天有橫規判儀之中以象地有特規斜絡天腹以候赤道南北植幹以法二極其中乃為游規窺管劉曜太史令昝崇斛蘭皆嘗為鐵儀其規有六四考定以象地一象赤道其二象二極乃是定所謂雙規者也其制與定法大同唯南北柱曲抱雙規下有縱衡水平以銀錯星度小變舊法而皆不言有黃道疑其失傳也唐李淳風為圓儀三重其外曰六合有天經

考宋史
作常

雙規金渾緯規金常規次曰三辰轉於六合之內圓徑八尺有璿璣規月游規所謂璿璣者黃赤道屬焉又次曰四游南北為天樞中為游筭可以升降游轉別為月道傍列二百四十九交以攜月游一行以為難用而其法亦亡其後率府兵曹梁令瓚更以木為游儀因淳風之法而稍附新意詔與一行雜校得失改鑄銅儀古今稱其詳確至道中初鑄渾天儀于司天監多因斛蘭昝崇之法皇祐中改鑄銅儀于天文院姑用令瓚一行之論而去取交有失得臣今輯古今之說以求數象有不合者十有三事其一舊說以謂今中國於地為東南當

令西北望極星置天極不當中北又曰天常傾西北極星不得居中臣謂以中國規觀之天常北倚可也謂極星偏西則不然所謂東西南北者何從而得之豈不以日之所出者為東日之所入者為西乎臣觀古之候天者自安南都護府至浚儀大岳臺纔六千里而北極之差凡十五度稍北不已庸詎知極星之不直入上也臣嘗讀黃帝素書立於午而面子立於子而面午至於自卯而望西自酉面望卯皆曰北面立於卯而負西立於酉而負卯至于自午而望南自子而望北則皆曰南面臣始不喻其理逮今思之乃常以天中為北也常以天

中為北則蓋以極星常居天中也素問尤為善言天者今南北纔五百里則北極輒差一度以上而東西南北數千里間日分之時候之日未嘗不出於卯半而入於酉半則又知天樞既中則日之所出者定為東日之所入者定為西天樞則常為北無疑矣以衡窺之日分之時以渾儀抵極星以候日之出沒則常在卯酉之半少北此殆放乎四海而同者何從而知中國之為東南也彼徒見中國東南皆際海而為是說也臣以謂極星之果中果非中皆無足論者彼北極之出地六千里之間所差者已如是又安知其茫昧幾千萬里之外邪今直

當據建邦之地人目之所及者裁以爲法不足爲法者宜置而勿議可也其二曰紘平設以象地體今渾儀置于崇臺之上下瞰日月之所出則紘不與地際相當者臣詳此說雖粗有理然天地之廣大不爲一臺之高下有所推遷蓋渾儀考天地之體有實數有準數所謂實者此數卽彼數也此移赤彼亦移赤之謂也所謂準者以此準彼此之一分則準彼之幾千里之謂也今臺之高下乃所謂實數一臺之高不過數丈彼之所差者亦不過此天地之大豈數丈足累其高下若衡之低昂則所謂準數者也衡移一分則彼不知其幾千里則衡之

低昂當審而臺之高下非所當卹也其三曰月行之道過交則入黃道六度而稍却復交則出於黃道之南亦如之月行周於黃道如繩之繞木故月交而行日之陰則日爲之虧入蝕法而不虧者行日之陽也每月退交二百四十九周有奇然後復會今月道旣不能環繞黃道又退交之漸當每日差池今必候月終而頓移亦終不能符會天度當省去月環其候月之出入專以曆法步之其四衡上下二端皆徑一度有半用日之徑也若衡端不能全容日月之體則無由審日月定次欲日月正滿上衡之端不可動移此其所以用一度有半爲法

也。下端亦一度有半，則不然。若人目迫下端之東以窺上端之西，則差幾三度。凡求星之法，必令所求之星正當穿之中心。今兩端既等，則人目游動，無因知其正中。今以鉤股法求之，下徑三分，上徑一度有半，則兩竅相覆，大小略等，人目不搖，則所察自正。其五前世皆以極星為天中，自祖衡以璣衡窺考天極不動處，乃在極星之末，猶一度有餘。今銅儀天樞內徑一度有半，乃謬以衡端之度為率。若璣衡端平，則極星常游天樞之外，璣衡小偏，則極星乍出乍入。令攢舊法，天樞乃徑二度有半，蓋欲使極星游於樞中也。臣考驗天中不動處，遠極

星乃三度有餘，今當為天樞徑七度，使人目切南樞望之星，正循北極樞裏周，常見不隱。天體方正，其六令攢以辰刻十干八卦，皆刻於紘。然紘平正，而黃道斜運，當子午之間，則日徑度而道促。卯酉之際，則日迤行而道舒。如此辰刻不能無謬。新銅儀則移刻於緯，四游均平，辰刻不失。然令攢天中單環，直中國人頂之上，而新銅儀緯斜絡南北極之中，與赤道相直。舊法設之無用，新儀移之為是。然當測窺如車輪之牙，而不當衡規如鼓陶。其旁迫狹，難賦辰刻。而又蔽映星度，其七司天銅儀黃赤道與紘合鑄，不可轉移。雖與天運不符，至於窺測

之時先以距度星考定三辰所舍復運游儀抵本宿度乃求出入黃道與去極度所得無以異於令瓚之術其法本於晁崇斛蘭之舊制雖不甚精褥而頗爲簡易李淳風嘗謂斛蘭所作鐵儀赤道不動乃如膠柱以考月行差或至十七度少不減十度此正謂直以赤道候月行其差如此今黃赤道度再運游儀抵所舍宿度求之而月行則以月曆每日去極度筭率之不可謂之膠也新法定宿而變黃道此定黃道而變宿但可賦三百六十五度而不能具餘分此其爲略也其八令瓚舊法黃道設於月道之上赤道又次月道而璣最處其下每月

移交則黃赤道輒變今當省去月道徙璣於赤道之上而黃道居赤道之下則二道與衡端相迫而星度易審其九舊法規環一面刻周天度一面加銀丁所以施銀丁者夜候天晦不可目察則以手切之也古之人以璿爲之璿者珠之屬也今司天監三辰儀設齒于環背不與橫簫會當移列兩旁以便參察其十舊法重璣皆廣四寸厚四分其他規軸椎重撲拙不可旋運今小損其制使之輕利其十一古之人知黃道歲易不知赤道之因變也黃道之度與赤道之度相偶者也黃道徙而西則赤道不得獨膠今當變赤道與黃道同法其十二舊

法黃赤道平設正當天度掩蔽人目不可占察其後乃
別加鑽孔尤為拙謬今當側置少偏使天度出北際之
外自不凌蔽其十三舊法地紘正絡天經之半凡候三
辰出入則地際正為地紘所伏今當徙紘稍下使地際
與紘之上際相直候三辰伏見專以紘際為率自當默
與天合又言渾儀製器渾儀之為器其屬有二相因為
用其在外者曰體以立四方上下之定位其次曰象以
法天之運行其在內璣衡璣以察緯衡以察經求天地
端極三明匿見者體為之用察黃道降陟辰刻運徙者
象為之用四方上下無所不屬者璣衡為之用體之為

器為圓規者四其規之別一曰經經之規二竝峙正抵
子午若車輪之植二規相距四寸夾規為齒以別去極
之度北極出紘之上三十有四度十分度之八強南極
下紘亦如之對銜二釭聯二規以為一釭中容樞二曰
緯緯之規一與經交於二極之中若車輪之倚南北距
極皆九十一度強夾規為齒以別周天之度三曰紘紘
之規一上際當經之半若車輪之什以考地際周賦十
二辰以定八方紘之下有趺從一衡一刻溝受水以為
平中溝為地以受注水四末建趺為升龍四以負紘凡
渾儀之屬皆屬焉龍吭為綱維之四捷以為固象之為

什宋史
作什

器爲圓規者四其規之別一曰璣璣之規二竝峙相距如經之度夾規爲齒對銜二釭釭中容樞皆如經之率設之亦如經其異者經膠而璣可旋二曰赤道赤道之規一刻璣十分寸之三以銜赤道赤道設之如緯其異者緯膠於經而赤道銜於璣有時而移度穿一竅以移歲差三曰黃道黃道之規一刻赤道十分寸之二以銜黃道其南出赤道之北際二十有四度其北入赤道亦如之交於奎角度穿一竅以銅編屬於赤道歲差盈度則并赤道徙而西黃赤道夾規爲齒以別均迤之度璣衡之爲器爲圓規二曰璣對峙相距如象璣之度夾規

爲齒皆如象璣其異者象璣對銜二釭而璣對銜二樞貫于象璣天經之釭中三物相重而不相膠爲間十分寸之三無使相切所以利旋也爲橫簫二兩端夾樞屬于璣其中挾衡爲橫一棲於橫簫之間中衡爲韉以貫橫簫兩末入于璣之罅而可旋璣可以左右以察四方之祥衡可以低昂以察上下之祥浮漏議曰播水之壺三而受水之壺一曰求壺廢壺方中皆圓尺有八寸尺有四寸五分以深其食二斛爲積分四百六十六萬六千四百六十曰復壺如求壺之度中離以爲二元一斛介八斗而中有達曰建壺方尺植三尺有五寸其食斛

有半求壺之水復壺之所求也壺盈則水馳壺虛則水
凝復壺之脇為枝渠以為水節求壺進水暴則流怒以
搖復以壺又折以為介復為枝渠達其濫溢枝渠之委
所謂廢壺也以受廢水三壺皆所以播水為水制也自
復壺之介以玉權醜于建壺建壺所以受水為刻者也
建壺一易箭則發土室以瀉之求復建壺之泄皆欲迫
下水所趣也玉權下水之槩寸矯而上之然後發則水
撓而不躁也復壺之達半求壺之注玉權半復壺之達
枝渠博皆分高如其博平方如砥以為水槩壺皆為之
纂無使穢遊則水道不慧求壺之纂龍紐以其出水不

土宋史
作上

窮也復壺士紐士所以生法者復壺制法之器也盛壺
鯤紐止水之瀋鯤所伏也銅史令刻執漏政也冬設熅
燎以澤凝也注水以龍嚼直頸附于壺體直則易浚附
于壺體則難敗復壺玉為之喙銜于龍嚼謂之權所以
權其盈虛也建壺之執室旣塗而彌之以重帛室則不
吐也管之善利者水所洩也非玉則不能堅良以久權
之所出高則源輕源輕則其委不悞而洩物不利箭不
效於幾衡則易權洗箭而改畫覆以幾衡謂之常不弊
之術今之下漏者始嘗甚密又復先大者管泐也管泐
而器皆弊者無權也弊而不可復壽者術固也察日之

畧以璣衡而制箭以日之畧跡一刻之度以賦餘刻刻有不均者建壺有管也贅者磨之創者補之百刻一度其壺乃善晝夜已復而箭有餘才者權鄙也晝夜未復而壺吐者權沃也如是則調其權此制器之法也下漏必用甘泉惡其逆之爲壺管也必用一源泉之冽者權之而重重則敏於行而爲箭之情慄泉之鹵者權之而輕輕則推於行而爲箭之情驚一井不可他汲數汲則泉濁陳水不可再注再注則行利此下漏之法也箭一如建壺之長廣寸有五分三分去二以爲之厚其陽爲百刻爲十二辰博牘二十有一如箭之長廣五分去半

以爲之後陽爲五更爲二十有五籌陰刻消長之衰三分箭之廣其中刻契以容牘夜筭差一刻則因箭而易牘鏹匏箭舟也其虛五升重一鎰有半鍛而赤柔者金之美者也然後漬而不墨墨者其久必蝕銀之有銅則墨銅之有錫則屑特銅久澆則腹敗而飲皆工之所不材也景表議曰步景之法惟定南北爲難古法置槩爲規識日出之景與日入之景晝參諸日中之景夜考之極星極星不當天中而候景之法取晨夕景之最長者規之兩表相去中折以參驗最短之景爲日中然測景之地百里之間地之高下東西不能無偏其間又有邑

屋山林之蔽，倘在人目之外，則與濁氛相雜，莫能知其
所蔽，而濁氛又繫其日之明晦，風雨人間煙氣塵空，變
作不常。臣在本局候景，入濁出濁之節，日日不同。此又
不足以考見出沒之實，則晨夕景之短長，未能得其極
數。參考舊聞，別立新術，候景之表三，其崇八尺，博三寸，
三分殺一，以爲厚者，圭首刻其南，使偏銳，其趺方厚，各
二尺，環趺刻渠受水，以爲準，以銅爲之表，四方志墨，以
爲中刻之綴，四繩垂以銅丸，各當一方之墨，先約定四
方，以三表南北相重，令趺相切，表別相去二尺，各使端
直，四繩皆附墨，三表相去，左右上下，以度量之，令相重

如一，自日初出，則量西景三表相去之度，又量三表之
端景之所至，各別記之。至日欲入候，東景亦如之，長短
同，相去之踈密又同，則以東西景端隨表景規之半折，
以求最短之景，五者皆合，則半折最短之景爲北，表南
墨之下爲南，東西景端爲東西，五候一有不合，未足以
爲正。旣得四方，則惟設一表，方首，表下爲石席，以水平
之植，表于席之南端，席廣二尺，長如九服，冬至之景自
表趺刻以爲分，分積爲寸，寸積爲尺，爲密室，以棲表，當
極爲雷，以下午景使當表端，副表并趺崇四寸，趺博二
寸，厚五分，方首，刻其南，以銅爲之，凡景表景薄不可辨

卽以小表副之則景墨而易度朝廷用其說令改造渾儀浮漏既成以括爲右正言司天秋宮正皇甫愈等優賞有差元豐五年翰林學士王安禮言歐陽發所上渾儀浮漏木樣變舊器之失請依式改造其至道皇祐渾儀景表各差舛請如法條奏修正從之元祐間蘇頌更作者上寘渾儀中設渾象旁設昏曉更籌激水以運之三器一機脗合躔度最爲奇巧宣和六年宰臣王黼言臣崇寧初邂逅方外之士于京師自云王其姓面出素書一道璣衡之制甚詳比嘗請令應奉司造小樣驗之踰二月乃成悉如唐一行之制然一行舊制機關皆用

銅鐵澀卽不能自運今制改以堅木若美玉之類舊制外絡二輪以綴日月而二輪蔽虧星度仰視躔次不審今制日月皆附黃道如蟻行磴上舊制雖有合望而月體常圓上下弦無辨今以機轉之使圓缺隱見悉合天象舊制止有候刻辰鍾鼓晝夜短長與日出入更籌之度皆不能辨今制爲司辰壽星運十二時輪所至時刻以手指之又爲燭龍承以銅荷時正吐珠振荷循環自運其制皆出一行之外卽其器觀之全象天體者璿璣也運用水斗者玉衡也昔人或謂璣衡爲渾天儀或謂有璣而無衡者爲渾天象或謂渾儀望筒爲衡皆非也

甚者莫知璣衡爲何器唯鄭康成以運轉者爲璣持正者爲衡以今制考之其說最近宜命有司置局如式製造詔可其後悉歸于金中興更謀制作不就蓋在廷諸臣罕通其制度者乃召蘇頌子攜取頌遺書考質舊法而攜亦不能通也至紹興十四年乃命宰臣秦檜提舉鑄渾儀而以內侍邵諤專領其事久而儀成三十二年始出其二寘太史局而高宗先自爲一儀寘諸宮中以測天象其制差小而邵諤所鑄蓋祖是焉朱熹家雖有渾儀類考水運制度卒不可得蘇頌之書雖在太抵於渾象爲詳而其尺寸多不載是以難遽復云舊制有白

道儀以考月行在望筩之旁自熙寧沈括以爲無益而去之南渡更造亦不復設焉

極度

極度者極星爲天之正中唐以來曆家以儀象考測則中國南北極之正實去極星之北一度有半此蓋中原地勢之度數也中興更造渾儀而太史局令丁師仁言臨安府地勢向南於北極高下當量行移易局官呂璨言渾天無量行更易之制若用於臨安與天參合移之他往必有差忒遂罷議後十餘年邵諤鑄儀果用臨安北極高下爲之以清臺儀校之實去極星四度有奇

黃赤道

黃赤道占天之法唐一行作大衍曆以儀揆測之得畢
觜參鬼四宿分度與古異皇祐初日官周琮以新儀測
候與唐一行尤異紹聖二年清臺以赤道度數有差復
命考正惟牛尾室柳四宿與舊法合其他二十四宿躔
度或多或少豈天度不齊隨古今而變也若夫黃道橫
絡天體列宿躔度隨歲差增減中興以來用統元紀元
及乾道淳熙開禧統天會元每一曆更一黃道其多寡
之異有不可勝載者而步占家亦隨各曆之躔度云
中星

中星者曆家推之以正四時如堯典所載虛鳥火昴是
已後世考驗冬至之日堯時在虛三代在女春秋在牛
至後漢永元在斗凡六十餘年輒差一度開禧占測在
箕宿較之堯時幾退四十餘度蓋自漢太初至宋已差
一氣有餘而太陽之躔十二次大約中氣前後乃得本
月宮次蓋太陽日行一度紀元曆定歲差約退一分四
十餘秒蓋太陽日行一度而微遲緩一年周天而微差
積累分秒而躔度見焉曆家考之萬五千年之後所差
半周天云

土圭

土圭測景始於周官後之造曆者必稽焉宋測景在浚儀岳臺崇寧間姚舜輔造曆求岳臺晷景以爲後法南渡清臺亦立晷圭如汴京制每於冬至測驗統天開禧二曆亦皆以六十二日數分爲冬至初限而議者謂臨安晷景當與岳臺異然土圭之法本以致日景求地中而表景不應災祥繫焉占家知之亦不能知所以也

刻漏

宋刻漏仍唐五代之制極精巧司天挈壺掌之所以定辰刻也唐殿前報時有詞梁以來廢景德四年復用舊詞天聖八年燕肅上蓮花漏法詔王立等攷定立審其

黃道日躔不應曆罷之景祐元年肅奉詔與楊惟德測驗竝合天道而丁度以爲久難行用復命章得象及馮元詳定皇祐初舒易簡等乃造刻漏以木爲權衡增平水壺元祐中蘇頌上儀象法要於渾天儀銅候儀渾天象三器之外又置刻漏四幅一曰浮箭漏二曰稱漏三曰沉箭漏四曰不息漏與儀象互相參考以驗天數與天運爲不差則寒暑之氣候自正也熙寧中沈括著書四卷皆非蹈襲前人之迹謂之熙寧晷漏自謂古今言刻漏者數十家皆踈舛未合天度且謂其術可以心得不可以言喻云

宋史新編卷十五

宋史新編卷十五

日食
日者君象受歲日食王者惡之寶元元年正月丙辰朔嘉祐四年正月丙申朔日俱食日官楊維德等欲移閏以避仁宗曰閏以正天時授民事不許至和元年四月甲午朔食九分是日雷雨降詔恤刑及預降德音蓋正陽之月亦所惡也熙寧六年四月朔日當食一夕微雨明日不見日食百官入賀是日有皇子之慶徽宗卽位

宋史新編卷十六

明南京戶部主事莆田柯維騏編

天文下

日食

宋史新編卷十六

兩年日食正陽陳瓘上曾布書謂臣道大疆之應紹興五年正月乙巳朔食于女占有喪又曰東國發兵是年徽宗崩五國城七年二月癸巳朔食于室占人主遊處不節外戚擅權十五年六月乙亥朔食于井占諸侯死又曰大旱民流亡三十年八月丙午朔食于翼占王者失禮宗廟不親又曰民流天下有大變兵起次年逆亮犯邊三十二年正月戊申朔食于女越五月內禪淳熙十年十一月壬戌朔食于心占曰食壬戌羣小萌食大半災重相死又曰法令有失將相相疑十五年八月甲子朔食于翼占在秋爲兵又在甲子夷兵動又在翼紹

興同占慶元元年三月丙戌朔食于婁占多冤訟其分有叛臣或大水又曰戒邊臣於是韓侂胄議北伐嘉泰二年五月甲辰朔食于畢占主大水諸侯死邊將亡遠國謀亂後三年吳曦叛伏誅其一歲再食者宋世凡三太平興國七年淳化四年咸平元年時則李繼遷叛蜀盜起契丹入寇故有此異若乾興元年七月日食幾盡斯仁宗初立女主當陽之異也德祐元年六月日食如夜斯胡元滅宋主中國之異也其他日食具載本紀間有當食不食者邵雍謂推測誤也淳化五年十二月朔日當食雲陰不見侍臣稱賀後遂爲例嘉祐六年六月

朔未初刻食四分入雲不見時議稱賀司馬光爲修起居注極論之徽宗時當食不虧則賀不及所當食分則又賀紹興中秦檜復舉舊制稱賀及檜卒高宗始詔免賀猶宣付史館

日變

日變或赤無光或生黑子或有黑光宋世屢有此異舉其驗者景德三年九月戊申日赭如赤占曰將相憂明年河陽節度使同平章事王顯卒崇寧二年五月癸卯日淡赤無光至申乃復宣和二年正月己未四年二月癸巳並蒙蒙無光靖康元年閏十一月庚申日赤如火

無光占曰君亡未幾徽欽陷於金開寶七年二月丙戌日生黑子者二熙寧十年二月辛卯黑子如李積十五日沒元豐元年閏正月庚子黑子如李積十九日沒十二月丙午復見二年二月甲寅復見積十日沒崇寧三年十月壬辰復見政和二年四月辛卯黑子乍二年三如栗八年十一月辛亥宣和二年五月己酉三年十二月辛卯俱有黑子建炎三年三月己卯黑子積二十四日沒紹興元年二月己卯六年十月壬戌七年二月庚子四月戊申八年二月辛酉十月乙亥並有黑子九年二月黑子月餘沒且其年再見淳熙十三年五月庚辰

紹熙四年十一月辛未慶元六年八月乙未並有黑子
十一月乙酉黑子積二十日沒嘉泰二年十二月甲戌
黑子積十四日沒四年正月癸未開禧元年四月辛丑
並有黑子占曰臣蔽主明一曰君有過而臣不諫一曰
臣不掩君過令民見自開寶以下考諸本紀行事如其
占若顯德七年正月癸卯黑光相盪德祐二年二月朔
黑子相盪其變頗相類與亡之應昭矣

日輝氣

周禮十輝曰稜象鑄監閭普彌序臍想後世因其法而
異其名內赤外青爲暈青赤氣在日左右爲珥居日上

爲冠爲戴居日下爲承爲履居日下左右爲紐爲纓環
向日爲抱背日爲背如半暈狀在日上爲負長而斜倚
日旁爲戟長而立日旁爲直如帶璫在日四方爲璫如
角在日四方爲提橫在日上爲格或重輪或五色或白
虹或慶雲皆謂之輝氣大抵氣黃則吉青則災純赤白
則凶故曰白虹者百殃之本衆亂所基也宋世輝象史
不勝載舉其大者如景德元年日抱珥黃氣充塞時車
駕親征契丹不戰而却紹興二年四月壬申日生戴氣
占曰推戴福佑之象次月之戊寅復然於是宗子伯琮
始育于宮中五年正月庚申復生戴氣是歲建資善堂

皇子建節封公淳熙十五年三月壬寅日半暈再重占
國民蕃息歲大和斯皆吉占也建炎三年春白虹貫日
占近臣爲亂或諸侯叛時有明受之變四年二月辛丑
白虹貫日時金虜始退羣盜大起紹興八年二月辛巳
白虹貫日占諸侯有叛或歲中有喪次年邦皇后崩于
五國城慶元元年正月白虹貫日占有兵又近臣爲亂
於是韓侂胄用事兵禍始矣前此紹聖元年四月癸丑
改元亦有此異考其時姦臣章惇曾布輩倡紹述之說
變亂朝綱亦與慶元同占也紹興二十一年四月壬申
日生暈占臣專政時秦檜在相位三十一年四月戊辰

日生暈周市占邊兵動虜主死其應在次年於是金主
亮果叛盟入寇尋爲其下所殺嘉定六年四月己卯日
生赤黃暈周市躔在胃宿占后族盛在胃則倉庫之官
凶或穀不登斯皆凶占也若乃祥符紹興隆興並有慶
雲之祥然大觀亦有之豈司天傳會邪
月食
月陰類后妃大臣之位其占曰月食盡大人憂又曰貴
臣死又曰兵起又曰旱宋世多有此異舉其甚者淳化
五年六月乙未食九分明年孝章皇后崩十二月癸巳
食既明年樞密劉昌言宰相呂蒙正參政蘇易簡相繼

宋史新編卷之六
五
罷咸平六年正月甲辰食七月壬寅再食明年契丹大
舉入寇皇祐四年十一月丙辰食未復而盡後三年張
貴妃薨嘉祐四年六月戊寅食幾盡十二月乙亥食既
明年太子少傅王舉正卒熙寧二年閏十一月丁未食
及八分在井度主五穀不登十年正月丙寅食及七分
在張度主后有憂周地貴人死及大戰拔城元豐元年
六月戊午食既在虛度主後宮憂大臣有咎齊分有喪
三者以分野言也若一歲再食之既者元符二年五月
丙辰十月甲寅崇寧二年二月甲子八月辛酉大觀四
年四月甲申九月庚辰迄宋世僅三見哲宗太子茂於

是年薨明年宮車晏駕徽宗啓釁強虜竝與占符云
月變

宋世月變舊史鮮載獨天禧四年四月乙酉兩月重見
占曰大臣爭權有誅又曰有大水其年宰相寇準爲丁
謂所構貶竄滑州河決京師大雨壞廬舍

月輝氣

暈珥及白虹諸氣竝與日輝同吉凶之占亦同宋世此
象數見獨中興之史頗載其占建炎四年十月己卯月
生五色暈占有後宮喜次年張婕妤吳才人進封紹興
二年二月丙子月未當闕體如食色赤黃占大臣黜又

宋史新編卷之六
曰臣下不奉法侵奪主勢於是張浚專制于蜀始召還
四年六月壬午月暈而珥占期六十日兵起五年至月
戊午月暈于東井占有胡兵一曰夷狄求和嘉泰三年
七月壬午白虹如半暈穿貫月中占曰大兵將起軍戰
於野數者皆驗又夷堅志載洪邁紹興三十二年五月
十六日五更過臨淮仰諦月外有環暈五重五色相去
各一丈知星者荆大聲附耳曰是爲月重輪前史所紀
不過兩三重而今五數但大陰極盛恐非太陽之利將
曉乃沒未一月而高宗遜于位

月犯五緯

司馬遷天官書云月蝕歲星其宿地饑若亡熒惑也亂
填星也下犯上太白也疆國以戰敗辰星也女亂按光
相掩謂之蝕光相逼謂之犯光相及謂之合其占同也
宋世多有此異姑舉一二大者如太平興國三年八月
甲戌月與太白合時契丹寇邊車駕親征連歲兵敗慶
曆六年月犯歲星者再連歲旱饑隆興元年月犯填星
者三其年師潰符離金人連歲犯州郡淳熙六年十一
月巳未月犯歲星占在齊分明年江浙淮西湖北旱
月犯列舍

史遷天官書云月犯列星宿地憂宋世多有此異史皆

著其占姑舉其可信者咸平二年正月巳卯月入南斗魁占在吳分明年兩浙大饑民疫五年十二月甲申月掩心前星占曰皇太子憂明年周王薨又皇太子生兩月不育景德二年六月月犯南斗占曰大臣死十月宰相畢士安卒大中祥符二年九月月入東井占曰有大水明年夏京師大水壞廬舍天禧二年六月月犯房占曰房中道也月行中道天下和平四年五月癸亥月掩日後星占曰臣下災有陰謀是年周懷政謀亂覺伏誅皇祐三年四月月入太微劉義叟占爲後宮有喪其後張貴妃薨嘉祐六年正月月掩心大星七月月復掩心

大星占曰心大辰海內之主宜奉天道崇德以讓之越二年仁宗崩元豐七年十月甲午月犯心大星如嘉祐占明年正月神宗崩宣和七年十二月丙辰月入太微垣占主君弱臣強四夷兵盛未幾有女真之難靖康時屢有此異紹興四年十二月丙戌月犯昴西北星占胡王死天子破匈奴不出三年於是金主吳乞買卒七年正月癸亥月逆行入鬼犯積尸占王者憂國有兵喪三月壬午復然於是徽宗寧德計至五月丁丑月犯建星占大臣相譖時張浚與趙鼎不協上疏毀之八月丙申月犯房第二星占次相憂於是張浚罷相貶永州十一

年十一月乙卯月入太微垣占大臣有憂於是岳飛下獄死韓世忠罷丙辰月犯進賢占賢者得罪明年胡銓貶張俊勒停自此賢者多貶黜死亡不可勝數隆興二年月犯長垣其閏十一月戊辰復如之長垣四星占主邊界城墻以備胡兵於是金人使來欲割四郡卒與之乾道二年六月乙酉月入斗八月庚辰復如之占女后憂太子辱九月庚戌月犯哭星主悲泣事十一月戊午月犯權星占曰女后憂明年皇后夏氏崩太子愔薨淳熙十四年五月月犯心大星又犯中央星是冬高宗崩嘉定元年二月丙午月犯昴占胡王死次年金人戕其

主允濟若月入羽林軍及月入氐宣和紹興以降此象數見或一歲屢見天下兵起皆如其占云

五緯俱見

五星之行遲速不齊其或並見見而聚一舍雖度數固然要非常有也乾德五年三月五星如連珠聚於奎當魯分從鎮星晨見東方景德四年五星當聚鶉火既而近太陽同時伏慶曆三年五星皆見於東方乾道四年五星皆見者三六年皆見者二八年又皆見淳熙十三年閏七月五星皆夕伏八月日月五星聚于軫按天官書五星合謂之易行有德受慶無德受殃乾德聚奎寶

儀嘗逆推其然謂自茲天下太平司天占子孫蕃昌爲
明年真宗誕降之兆從鎮星者王者以重致天下重福
也景德之占臣避君之明也慶曆之占中國安寧也淳
熙七政共集前史未之聞語在王信傳若大中祥符元
年十月庚寅五星順行同色六年正月癸巳五星順行
五色占曰天下兵偃云
五緯相合 五緯相犯
合與犯義無甚別久則謂之守皆凶占或饑或旱或兵
或喪或爲外憂或爲內難其在列舍亦然宋司天多有
吉占何歟迄宋世五星互相合及三星合者往往有之

而四星合者惟靖康元年六月丙辰爲然按占三星合
是謂驚立絕行四星合兵喪竝起君子憂小人流靖康
鎮星熒惑太白歲星合未幾徽欽陷於金是其應也若
三星合見於占者有二紹興十九年七月丁未太白歲
星辰星合于張占其分國當之是歲金完顏亮弑其主
亶自立慶元三年八月甲戌太白熒惑歲星合于翼占
同上後二年光宗崩其他相犯不可勝書其最異者如
建隆元年正月甲子太白犯熒惑于婁十月壬申又犯
于軫占曰荆楚有兵時李重進起兵揚州討平之建炎
四年六月戊子熒惑與鎮星合于亢占主兵喪旱是歲

虜再犯淮立偽齊江湖羣盜大起鄭后討至明年隆祐
太后崩十一月辛丑太白歲星合于南斗占爲戰大將
死又西方凶於是張浚以五路之師敗于富平誅趙哲
次年陝西皆陷紹興九年九月丁未辰星歲星合于角
庚申太白歲星合于角十月壬申太白歲星合于氏竝
占云大將死明年岳飛死于獄隆興元年七月壬寅熒
惑辰星合于柳占在周外秋爲兵是年有符離之敗二
年正月丁亥至巳丑熒惑犯守歲星按熒惑犯歲星主
冊太子有赦守之太子危明年立莊文太子未幾太子
薨是其應也

五緯犯列舍

建隆元年十月癸卯熒惑犯進賢十一月又犯氏占曰
後宮災明年昭憲皇太后崩三年十月熒惑犯氏明年
孝明皇后崩淳化五年十月熒惑犯氏西南星明年孝
章皇后崩咸平元年六月庚戌歲星入氏占曰氏爲路
寢王者宿宮歲星三入天子當將兵於野明年契丹犯
塞車駕幸河北七月癸酉太白犯角左星占曰有兵戰
不勝將軍憂明年契丹寇河間副都部署康保裔戰死
六年十一月甲辰熒惑犯太微上相占曰上相憂明年
宰相李沆卒景德三年九月戊子辰星晨見東方在亢

太白又見西方在尾占曰金水各出一方占有兵不戰
建炎三年三月乙未填星犯亢占曰臣有謀是月苗傅
劉正彥作亂八月丙寅熒惑入太微垣占天下不安草
澤天文耿靜言熒惑行當在巳今超過午入太微凶十
一月乙巳熒惑出太微垣東左掖門巳酉犯垣東上相
徘徊不去是歲金虜大入江浙湖南上航海幸溫台又
乃還越紹興二年正月丙申熒惑入氏占天子失其宮
是月上移蹕臨安六年五月辛卯太白犯畢上謂輔臣
曰金星犯畢占邊有敗兵當諭張浚令諸帥戒飭守邊
者雖自有分野我亦不得不戒也明年酈瓊殺呂祉以

其軍降劉豫十七年五月壬戌歲星順行入東井占天
下有川瀆之事於是浙西建康同日大水三十二年正
月戊寅歲星退行入太微垣占軌道吉又曰天下喜或
有赦五月乙未順行入太微垣占同是年孝宗受禪乾
道五年正月壬戌鎮星留守諸王星明年魏王愷薨十
四年十月庚辰熒惑留守五諸侯星占諸侯貴人死次
年恩平郡王璩薨紹熙四年十月丁酉熒惑入太微垣
內徘徊內屏者四閱月占宮中不安歲饑又有喪次年
六月孝宗崩若明道元年八月太白犯軒轅紹聖三年
熒惑再犯軒轅史遺其占按軒轅為後宮未幾郭后孟

后廢是其應也開寶九年天禧五年熒惑犯南斗史亦遺其占按斗為天廟主天子壽筭未幾太祖真宗崩是其應也

歲星晝見

日出星伏陰陽之常道星見于晝則逆其常矣其占為臣強為更王宋世歲星晝見者凡六嘉祐五年六年七年連晝見明年三月仁宗崩其秋及治平元年連晝見後三年英宗崩元符二年晝見明年哲宗崩皆更王之應也然歲星所臨必有吉祥劉敞在嘉祐末言歲星往來虛危間色甚明盛當有興於齊者歲餘英宗以齊州

防禦使入繼大統建炎四年秋金虜方退高宗駐蹕會稽毛隨謂商周之興皆與歲星符今年冬歲星當躔而興宋自此虜必不能南渡矣紹興三十一年逆亮渝盟鄭樵言歲星分在宋金主將自斃未幾亮為其下所弒與毛隨之說同敞樵俱有傳隨為武功大夫家衢之江山云

太白晝見經天

劉向五紀論謂太白少陰弱不得專行故以巳未為界不得經天而行經天則晝見宋舊史又分晝見經天為二謂太白行至午位避日而伏若行至未即謂經天經

天者異甚歲再見者尤甚舉其可驗者如淳化元年太白晝見者三四方連歲水旱民多流亡咸平六年太白再晝見其冬李繼遷攻西涼府殺守臣明年契丹復犯塞車駕禦于澶州嘉祐七年太白再晝見一經天明年仁宗崩熙寧八年太白再晝見交趾連歲入寇陷州郡紹熙四年太白晝見者是時光宗疾明年孝宗崩嘉定十年太白再晝見再經天數年之內金兵犯蜀紅巾盜起太子詢薨更立皇子寧宗崩蓋與歲星同占云

老人星

南極謂之老人星主壽昌宋東都以前史不絕晝而微

宗時見凡四十仁宗無一焉高宗但一見而已孝宗以下亦無一焉大抵有德則吉否則凶道君縱欲敗度虐用其民卒為女真所虜身死沙漠壽昌之應安在哉

景星

天官書曰景星者德星也其狀無常出於有道之國荆州占以景星周伯含譽格澤竝謂之瑞星或以周伯含譽格澤歸邪天保竝謂之景星按開寶四年景星見景德三年周伯星再見祥符七年含譽星再見九年周伯星見景祐至治平奇星屢見史亦謂之瑞星古無所考按明道二年有星見似彗史奏以為含譽星紹興三

十一年六月己巳北斗東北有一小星出光似彗史亦以為含譽星竝非也

妖星

五星之精變為妖星天狗蚩尤旗枉矢之類是也天官書謂蚩尤旗見王者征伐四方然陵夷之運則為凶占政和七年十二月朔有星如月未幾掖庭大火朔方喪師方臘盜起殺守將淳熙十四年五月有星出濁際如日與日摩盪而入高宗在德壽宮登臺見之召能天文脩武郎王道問之道奏曰是謂蓬星見則有兵然分非中國夷狄應之耳出語所親曰非兵也喪爾某不敢言

是冬高宗不豫遂崩於是金人亦有大喪嘉定十一年蚩尤旗竟天時金人入寇紅巾盜起兵戈連歲不解咸淳十年九月有星見西方曲如蚓未幾元兵陷臨安

彗孛

晏子對齊景公分彗孛為二春秋惟有星孛之書申須謂彗即孛也其占為喪為旱為兵又除舊布新之象也如開寶八年六月甲子彗出柳長四丈晨見東方西南指歷輿鬼至東壁凡十一舍八十三日而滅是歲平江南咸平六年十一月甲寅有星孛于井鬼大如杯色青白光芒四尺餘犯五諸侯歷五車入參凡三十餘日沒

宋史新編卷之六
占_有燕兵明年契丹人寇治平三年三月庚申彗出營
室晨見東方長七尺許西南指危泊墳墓漸東速行近
日而伏至辛巳夕見西北有星無芒彗益東行別有白
氣一闊三尺許貫紫微極星并房宿首尾入濁益東行
歷文昌北斗貫尾至壬午星復有芒彗長丈餘闊三尺
餘東北指歷五車白氣為岐橫天貫北河五諸侯軒轅
太微五帝座內五諸侯及角亢氐房宿癸未彗長丈五
尺有星孛氣如一升器歷營室至張凡一十四舍積六
十七日星氣孛皆沒占為兵喪水旱饑疫之災明年正
月英宗崩靖康元年六月壬戌彗出紫微垣閏十一月

彗復出竟天紫微為天子之宮主破軍亡國明年金人
入寇徽欽就虜紹興二年八月甲寅彗見胃至九月甲
戌乃沒次年金虜陷金州入興元嘉定十五年八月甲
午彗出右攝提長三丈體小如木星凡兩月行歷氐房
心乃滅蒙古耶律楚材謂其主曰女真將易主矣明年
金主珣殂其餘悉載本紀其應多為兵云
客星

荆州占及張衡所論客星之名甚衆具載晉志按周伯
乃瑞星見則其國壽昌顧謂之客星何歟宋舊史槩為
凶占又何歟按宋世客星屢見大者如桃間有芒彗或

宋史新編卷一百一十一
犯列宿或守列宿其可徵者景德二年八月客星出紫
微天棊側孛孛然如粉絮稍入垣內歷御女華蓋十餘
日乃沒後二年皇后郭氏崩而美人劉氏有寵竟立為
后至和元年日食正陽客星出于昴劉義叟曰契丹宗
真其死乎後果然紹興八年五月客星守婁魯分也虜
將悟室占之太史曰無傷至七月虜殺魯兗滕虞等二
十一王九年客星守亢陳分也悟室封陳王九月被誅
乾道二年六月客星出前星之左荆大聲謂洪邁曰恐
非東宮福三年客星出軒轅之側大聲曰恐非中宮福
已而竝驗

流隕

東西橫行及自上而隕竝曰流前志以流星為貴使又
為外兵眾則為民流又為下去其上之象墮軍中者為
破敗之徵有青黃赤白諸色大或如桃如瓜如杯如盃
如斗或初小而後大其狀或如彗或如太白有光燭地
者有聲如雷者有慢行者有速行者有晝出者有經天
者有犯列宿者有散為雲氣者有散為小星者有既沒
而尾跡久方滅者亦有當晝而流隕者前史所書甚者
不過一歲頻見而已宋志則無月無之今舉其大者如
建隆三年五月乙丑天狗墮西南占曰其地有兵後王

師討西蜀孟昶既降草寇連年方定開寶三年九月八日庚午廣州民見衆星皆北流知星者言劉氏歸朝之象明年銀被擒太平興國三年八月壬寅有星出紫微鉤陳東大如盃赤黃色向北速行近北極沒占曰外國有使至是冬三佛齊吐蕃山後兩林蠻來貢大中祥符二年五月乙亥有星晝出東方如太白尾跡赤黃流至日北沒占曰蠻夷起其年黎州蠻擾邊七年十一月癸未星晝出日西南大如盃尾跡青白色西流而沒占爲旱火明年楚王宮災宣和七年十月戊子有星出王良北如杯急流入紫微垣上輔北赤黃有尾跡照地主

大兵將起天下大亂人君惡之未幾金兵入寇靖康元年六月癸丑有星大如五斗器衆星隨之其光燭地起東南墮西北有聲如雷或謂之天狗未幾徽欽北遷嘉泰中西北有星白芒墮地其聲如雷知夔州何異占之曰戌日酉時水土交會而妖星自東南衝西北化爲天狗蜀其將有兵乎後四年吳曦叛端平二年春天狗墮淮安軍金棠縣聲如雷數州之人皆聞之化爲碎石未幾蜀將曹友聞死元兵大舉入蜀蜀禍始此德祐元年春星闕于中天墮其二未幾元伯顏陷臨安帝后北遷若乃元祐八年十月戊申星出東壁西慢流至羽林軍

宋史新編卷之十一
沒太史占主擢用文士賢臣在位紹聖元年二月丙午
星出壁室東沒占同二年二月癸卯星出靈臺北行至
軒轅沒占賢臣在位天子有子孫之喜考其時事皆相
反洪邁所謂國朝星官曆翁之伎殊愧漢唐占測茫昧
幾於可笑者此類不能悉舉也
星變
星變或生角或生芒或體動搖或偏向南渡舊史載紹
興見者一隆興見者二乾道淳熙見者各一而東都以
前及光宗以後不之載司天失之也
雲氣

雲氣有蒼黑赤白黃諸色或如虹或如帚或如匹布黃
者其占吉宋世諸氣數見姑舉其尤異者若開寶元年
十月己未旦西北起蒼白氣三道長二十尺趨東散占
曰游兵之象咸平六年六月辛未赤氣出婁貫天庾占
曰食廩災天聖七年二月己卯夜蒼黑雲長三十尺貫
弧矢翼軫占曰荆楚水元祐三年七月戊辰夜東北方
近濁天明照地如月將出漸徧西北有白氣經天占主
兵宜防西北二鄙元符二年九月戊辰夜赤氣起北方
紫微垣北斗星東南次有白氣十道各長五尺主兵及
大臣黜崇寧元年十一月己酉赤氣隨日沒主大旱及

外有告急建炎四年五月壬子赤雲亘天中有白氣十餘道貫之如練起紫微垣犯北斗及文昌由東南而散占兵大起又所向兵至宮中有喪寧宗開禧中乃金主璟末年也一日北方赤氣如血東西亘天金處士杜時昇占謂天下當大亂亂而南北當合爲一消息盈虛循環無端後良驗其餘赤氣白氣互見五行志凡黑氣及蒼黑氣皆主水白氣及赤白氣多主兵喪亦主風凡雲氣及日月列星之變七日內有風雨則散災

宋史新編卷十六

宋史新編卷十七

志三

明南京戶部主事莆田柯維騏編

五行上

人受天地之中以生其氣通也氣和則祥臻氣乖則異降在匹夫猶爾何況王者參二儀而子萬國哉箕子洪範所陳尚矣漢以來宓生董仲舒及劉向父子皆號名儒能推陰陽五行之致爲說一何詳也夏侯勝援以諫昌邑防陰謀而霍張實然從此益重經術士後世學者率訾其誣欲盡廢其書毋矯之過乎宋世災眚其大者頗關時事獨休祥之奏盛於真宗徽宗朝真宗姑置勿

論徽宗身虜國亡厥符安在蓋蔡京襲丁謂故知傳會以取寵帝方飾太平縱逸欲弗悟其爲欺耳昔魯之桓宣敦倫逆天宜獲災譴仲尼修魯史惟於二公有年大有年存弗削程氏以爲紀異道君之祥借曰有之非桓宣類邪兩漢史皆本五行傳爲志有災眚禍疴之目繫以事應宋舊史槩倣之顧休祥竝載均可爲鑒者茲亦不之略也若日月星辰之變互見天文志

洪範水曰潤下水失其性則爲災沴恒寒鼓妖魚孽豕禍雷電霜雪雨雹黑眚黑祥皆屬焉

太平興國六年鄜延寧三州竝河水漲溢壞州城及軍

營民舍溺死甚衆鄜州建武指揮李海及老幼六十三人皆溺焉八年六月雄州易水鞏縣洛水永定澗水及鄜州河水竝漲溢爲害尤甚者穀洛伊漣四水暴漲壞京城官私廬舍萬區溺死者萬計治平二年八月庚寅大雨水壞官私廬舍漂人民畜產不可勝數是日宰相而下朝參者十數人而已詔開西華門洩宮中積水水奔激殿侍班屋皆摧沒元祐八年四月雨至八月不止畿內京東西淮南河北諸路大水詔開京師宮觀五日所在令長吏祈禱宣和元年五月大雨水驟高十餘丈犯都城自西北車駝岡連萬勝門外馬監居民盡沒前

數日城中井皆渾宣和殿後井水溢蓋水信也未幾有
北虜之禍與北方寶鼎同占王莽大旱太平興國三年滑州黎陽縣河清端拱元年澶州河清
祥符大觀政和宣和間屢有河清之祥見本紀凡不
大中祥符元年二月醴泉出蔡州鳳原鄉飲者愈疾五
月出泰山八年十一月出汶山下天禧二年閏四月出
京師熙寧元年五月出京師政和五年正月出河陽
天禧元年十二月至和元年正月嘉祐元年正月並京
師大雪苦寒凍死者衆元祐二年冬京師大雪連月至
春不止又陰恒寒罷上元遊幸政和三年十一月大雨

雪浹旬不止平地八尺餘詔百官乘轎入朝飛鳥多死
靖康元年閏十一月大雪盈三尺不止天地晦冥或雪
未下時陰雲中有雪絲長數寸墮地二年正月丁酉大
雪寒甚地冰如鏡不能行乙卯欽宗在青城大雪數尺
人多凍死建炎三年六月寒紹興三十一年正月戊子
大雨雪至于巳亥禁旅壘舍有壓者寒甚乾道元年二
月大雪三月暴寒損苗稼二年春大雨寒至于三月損
蠶麥六年五月大風雨寒傷稼慶元六年五月亡暑氣
凜如秋

鳳和四州霜殺稼幾盡、
政和七年六月京師大雨雹如拳紹熙二年三月建寧府溫州並大風雨雹大如桃李平地盈尺壞民居數千家慶元三年四月雨雹大如楮破瓦殺燕爵、
端拱二年八月興化軍民劉政雷震死有文在胷曰大不孝至道元年三月甲戌雷未發聲占云寬政之應咸平六年十一月甲午京師暴雷震改元肆赦詔宰相廣采民病悉除之建炎四年正月己未雷高宗舟次溫州章安鎮謂宰臣曰雷聲甚厲前史以爲君弱臣強四夷兵不制是夕金人破明州紹興中震雷疊見、

淳熙十四年六月甲申昧爽禱雨太乙宮乘輿未駕有大聲自內發及和寧門人馬辟易相踐有失巾屨者、
慶元三年二月饒州景德鎮漁人得魚頰尾鯉鱗而首異常土人言紹興二年嘗出後爲水災五月鎮果大水皆魚孽也嘉定十七年海壞幾縣鹽官地數十里先是、
有巨魚橫海岸民鬻食之海患共六年而平、
景祐元年六月開封府淄州蝗諸路募民掘蝗種萬餘石嘉定八年自夏徂秋諸道捕蝗者以千百石計饑民競捕官出粟易之九年荐饑官以粟易蝗者千百斛、
慶元三年四月餘于縣民家豕生八豚其二爲鹿古田

縣豕食嬰兒、
元豐末嘗有物大如席夜見寢殿上而神宗崩元符末
又數見而哲宗崩至大觀間漸晝見政和以後大作每
得人語聲則出先若列屋摧倒之聲其形僅丈餘髮髯
如龜金眼行動脛脛有聲黑氣蒙之不大了了氣之所
及腥血四灑兵刃不能施或變人形或為驢自春歷夏
晝夜出無時冬則伏多在掖庭亦嘗及內殿後習以為
常人亦不大怖宣和末寢少而亂作政和三年夏至宰
臣何執中祀北郊有黑氣長數丈出齋宮行一里許入
壇壝繞祭所皆近人穿燈燭而過宣和中洛陽府畿間

忽有物如人或蹲踞如犬色正黑不辨眉目始夜則掠
小兒食之後雖白晝入人家為患謂之黑漢有力者夜
執槍棒自衛亦有託以作過者如此二歲乃息建炎三
年二月甲寅日初出兩黑氣如人形夾日旁至巳散黑
氣陰沴也亦兵象

乾道四年春舒州雨黑米堅如鐵淳熙十一年二月臨
安府新城縣深浦天雨黑水終夕皆黑祥也
紹興十四年樂平縣河衝里田隴數十百頃田中水類
為物所吸聚為一直行高平地數尺不假隄防里南程
氏家井水溢亦高數尺天矯如長虹聲如雷穿墻毀樓

二水鬪于杉墩且前且卻良久各復故與史記魯穀洛水鬪同占京房曰天子弱諸侯力政厥異水鬪靖康元年正月丁未霧氣四塞對面不見建炎二年十一月甲子北京大霧四塞是夕城陷四年三月乙丑四方霧下如塵紹興三年自正月陰晦陽光不舒者四十餘日五年七月劉豫毀明堂天地晦冥者累日

太祖從周世宗征淮南戰于江亭有龍自水中向太祖奮躍乾德五年夏京師雨有黑龍見尾于雲際自西北趨東南占主大水明年州府二十四水壞田廬開寶元年夏六月龍出單父民家井中大風雨漂民舍四百區

死者數十人七年六月棣州有火自空墮于城北門樓有物抱東柱龍形金色足三尺許其氣甚腥旦視之壁上有煙痕爪跡三十六宣和元年夏雨晝夜凡數日及霽開封縣前茶肆中有異物大如犬蹲踞臥榻下與世所繪龍無異茶肆近軍器作坊兵卒來觀共殺食之已而京城大水乾道五年七月乙亥武寧縣龍鬪于復塘村大雷雨二龍奔逃珠墜大如車輪牧童得之自是連歲有水災

宣和五年馬生兩角長三寸四足皆生距時北方正用兵紹興八年廣西海壩有海獸如馬蹄鬣皆丹夜入民

舍聚衆殺之。明日海溢環村百餘家皆溺死。近馬禍也。淳熙十二年黎雅州獻馬有角長二寸。京房易傳曰。臣易上政不順厥妖馬角。茲謂賢士不足。紹熙元年二月丙申右丞相留正乘馬早朝入禁扉馬斃。嘉定五年正月史彌遠入賀于東宮馬驚墮地衣幘皆敗其額微損事與上同。

建隆三年齊州晉州大旱民家多生魃。太平興國中揚子縣民妻生男毛被體半寸餘面長頂高烏肩眉紫唇紅耳厚鼻大類西域僧。至三歲畫圖以獻。淳化元年汾州悉達院僧智嚴頭生角三寸。自建隆至靖康民間生

三男者數百亦多有生四男者。前志以爲人民蕃息之驗。宣和六年都城有賣青果男子孕而生子蓐母不能收易七人始免而逃去。豐樂樓酒保朱氏有婦可四十餘楚州人忽生髭長僅六七寸。疏秀而美宛然一男子。特詔度爲女道士。紹興三年建康府桐林灣婦產子肉角有齒自是以後人多產鱗毛。乾道五年衡湘間人有化爲虎者。潮州城西婦孕過期產子如指大五體皆具者百餘。蠕蠕能動。淳熙十三年行都有人死十有四日復生。十四年六月臨安府婦產子生而能言四日暴長四尺。紹熙元年崑山縣工采石而山壓三年六月它工

采石鄰山聞其聲呼相應答如平生其家鑿石出之見其妻喜曰久閉乍風肌膚如裂俄頃聲微噤不語化爲石人貌如生嘉定元年四月鎮江後軍妻生子一身二首四臂晉志謂中原分裂之應此人疴也後數年金人入太原

建炎元年三月金人圍汴京城中疫死者幾半紹興二十六年夏行都大疫高宗出柴胡製藥活者甚衆德祐元年六月庚子是日四城遷徙流民患疫而死者不可勝計天寧寺死者尤多二年閏三月數月間城中疫氣薰蒸死者不可以數計

熙寧元年七月戊子丑之五刻西南雲間有聲鳴如風水相激寢周四方主民勞兵革歲動六年七月丙寅丑之四刻西北雲間有聲如磨物主百姓勞七年七月庚子丑之三刻西北天鳴主驚憂之事紹興二十一年八月乙亥天有聲如雷水響于東南四日乃止開禧元年六月壬寅天鳴有聲如熙寧占淳熙十六年三月壬寅石隕寶應縣散如火甚臭腥慶元三年六月黃巖縣大石自隕雷雨甚至山水瀆湧洪範火曰炎上火失其性則爲災貴恒煥草妖羽蟲之孽羊禍赤眚赤祥之類皆屬焉

淳化四年二月永州保安津舍火飛焰過江燒州門及民屋三百餘家天聖七年六月丁未大雷雨玉清昭應宮火宮凡二千六百一十區一夕俱焚但存一殿治平三年温州火延燔萬餘家死者五千人元豐八年二月開寶寺火時寓禮部貢院於寺點校試卷官翟曼陳之方馬希孟焚死重和元年九月掖庭大火自甲夜達曉大雨如傾火益熾凡藝五千餘間後苑廣聖宮及宮人所居幾盡焚死者甚衆靖康元年十二月丙子夜尚書省火延燒禮祠工刑吏部折尚書省牌擲火中禳之乃息紹興二年五月庚辰臨安府大火亘六七里燔萬數

千家十二月甲午行都大火燔吏刑工部御史臺官府民居軍壘盡乙未旦乃熄淳熙七年八月温州試士火作于貢闈紹熙二年四月行都傳法寺火延及民居言者以戚里土木爲孽火數起之應是月徽州大火自庚子至于壬寅乃熄嘉泰元年三月戊寅行都大火凡四日乃滅燔御史臺司農寺將作軍器監進奏文思御輦院太史局軍頭皇城司法物庫御廚班直諸軍壘延燒六萬家城內外亘十餘里死者不可計百官多僦舟以居火作於寶蓮山御史臺胥楊浩家諫議大夫程松請戮浩以謝都民疏再上始黥配萬安軍猶免決自是民

訛言相驚亡賴因縱火為姦利三年正月丁酉襄陽府
 火作而風暴選鋒軍校于友直死於救焚止延燒六十
 餘家帥漕臣上其功贈二秩官其子四年三月丁卯行
 都大火燔尚書中書省樞密院六部右丞相府學士院
 延及太廟凡燔三千家開禧二年二月癸丑壽慈宮火
 嘉定十三年十一月壬子行都火延燔數萬家禁壘百
 二十區紹定四年九月丙戌夜行都火延及太廟三省
 六部御史臺祕書省玉牒所惟丞相史彌遠府獨存蓋
 殿帥馮榘率衛士力救之也嘉熙元年五月行都大火
 燔三萬家德祐元年玉牒所災自紹興以來行都屢火

此特記其大者

嘉祐六年冬無冰七年亦然斯恒燠也紹興五年五月
 大燠四十餘日草木焦槁山石灼人暍死者甚眾嘉定
 八年夏五月大燠草木枯槁百泉皆竭行都斛水百錢
 江淮杯水數十錢暍死者甚眾

淳化三年十月太平興國寺牡丹生華占云有喪是月
 恭孝太子薨大中祥符以來封禪事作丁謂王欽若暨
 諸州軍連歲獻芝草三年四月京師竹有華占云歲不
 豐乾興元年六月蘇秀二州湖田生聖米居民取以食
 興州竹有實如大麥民取以食天聖元年五月興州竹

有實如祥符占皇祐三年知無爲軍茹孝標獻芝草仁
宗怒飭州郡勿復獻語在本紀熙寧元年益陽縣雷震
山裂出米可數十萬斛齎至京師信米也但色黑如炭
崇寧五年河南府嘉禾與芝草同本生大觀三年西京
大慶觀聖祖殿嘉禾芝草竝生政和中建州境內竹生
朱數千萬石越州承天寺瑞竹一竿七枝幹相似葉圓
細生花結實宰臣蔡京等拜表賀自是祥瑞日聞玉芝
產禁中無虛歲外則中書尚書二省太學醫學亦產紫
芝諸州屢獻芝草汝州六萬本其間連理雙枝者一千
八百八十有司不勝其紀初猶表賀後以爲常不皆賀

宋史

也紹興元年七月乙未浙西安撫大使劉光世以粘結
生穗奏瑞高宗曰朕在潛邸梁間生芝官僚皆欲上聞
朕手碎之不欲寶此奇恠乃却之十六年正月辛未瀘
州天雨豆近草妖也二十五年瑞木瑞芝瑞瓜瑞蓮瑞
禾疊見與大觀二瑞俱詳載儀衛志其冬秦檜卒高宗
曰比年四方奏瑞文飾取悅若信州林機奏秦檜父祠
堂生芝佞諛尤甚明年詔郡國無獻瑞慶元五年八月
太室西北夾室楹生白芝四葉前史以白芝爲喪祥明
年八月國連有大喪當時權禮部侍郎何異謂色白慮
生兵妖韓侂胄惡之無河北征之議起亦其驗也

大中祥符六年七月召近臣觀嘉禾于後苑有七穗至四十八穗繪以示百官天聖六年陳州獻瑞麥圖一莖二十穗八年八月召近臣觀瑞穀於元真殿皇祐三年五月彭山縣上瑞麥圖帝曰朕嘗禁四方獻瑞今得西川麥秀圖可謂真瑞矣其賜田夫束帛以勸之元祐二年十月定襄守臣得禾異畝同穎者二本部使者張商英作嘉禾頌大觀四年蔡州麥一莖兩歧至七八歧者九十畝九月宰相張商英上袁州瑞禾圖政和元年知河南府鄧洵武二年知定州梁士野各奏禾麥之瑞五年冬台州進寧海縣早禾一稔二米者凡三石時方脩

明堂遂協成典禮詔許表賀自是史官多記奇祥異瑞以麥禾爲常事不書景定元年建陽縣嘉禾生詔改縣名咸淳六年樂清縣嘉禾生詔增薦士額皆賈似道當國也

端拱元年八月清遠縣解舍有鳳集柏樹高六尺衆禽隨之東北去知州李昌齡圖以獻景德元年五月白州有三鳳自東來入城中衆禽圍繞至萬歲寺棲百尺木上身長九尺高五尺文五色冠如金盃北向而去畫圖以聞熙寧七年六月增城縣鳳凰見

至道元年九月京師自旦至酉羣鳥百餘萬飛翔有聲

識者云突厥雀大中祥符元年春昇州黃雀羣飛蔽日有從空墜者占民有役事是歲火治平間有杜鵑鳴于洛陽邵雍曰天下將亂地氣自南而北禽鳥得氣之先者也徽宗卽位瑞鶴屢見繪爲旗語在儀衛志宣和元年蔡京等表賀赤烏又賀白鵲自政和後禁苑多爲村居野店聚珍禽野獸鹿鹿駕馭禽鳥實其中每秋風夜靜禽獸之音四徹宛若深山大澤陂野之間識者以爲不祥宣和末南郊禮畢御郊宮天未明百辟方稱賀忽有鴉鳴殿屋若與贊拜聲相應聞者駭之明年有陷城之難建炎二年二月辛亥高宗在揚州早朝有禽翠羽

飛鳴行殿三市一再止于宰臣汪伯彥朝冠冠尊服飛鳥踐之不祥翠羽又青祥也劉向以爲野鳥入宮宮室將空一曰敗亡之應是月金人入揚州有倉卒渡江之變伯彥罷相尋貶四年正月金人圍陝州有鴛鴦數萬飛噪城上與戰聲相亂金將婁宿曰城當陷急攻之遂失守近羽孽也紹興七年僞齊劉豫後苑梟鳴又羣鳴于內庭如曰休也豫惡之募人獵一梟者予五千錢是歲國除乾道六年邵武軍泰寧縣有雀飛鳴立死于瑞寧佛刹香爐先是紹興初是邑有雀立死于丹霞佛刹香爐皆羽孽也而浮屠氏因謂之雀化

紹興十七年汀州羊無角嘉定九年信州玉山縣羊生駢首

宣和元年二年四年七年並有赤氣赤雲之異占天下兵起靖康元年赤白氣起西方者一日旁有赤氣者二赤氣亘天者一占同上建炎元年八月庚午東北方有赤氣占曰血祥四年五月洞庭湖夜赤光如火見東北亘天俄轉東南亦血祥也嘉泰四年二月庚辰夜有赤雲間以白氣東北亘天占為火祥後八日臨安大火迫近太廟

慶曆三年十二月天雄軍德博州天降紅雪盡血雨紹

興二十年十一月建昌軍新城縣永安村大風雪夜半若數百千人行聲語笑歌哭雜擾忽遽而凝寒陰黑咫尺莫辨明旦雪中有入畜鳥獸蹄迹流血汙染十餘里入山乃絕淳熙十三年臨安府民家有血自地中出濺染汙人衣端平三年七月甲申天雨血寶祐二年蜀中雨血

靖康二年正月巳亥夜西北陰雲中有火長二丈餘闊數尺時時見紹興三十二年建昌軍新城縣有巨室篋中時有火光燔衣帛過半而篋不焚近火孽也

中執事人長...
 十二年...
 十五年...
 十六年...
 十七年...
 十八年...
 十九年...
 二十年...
 二十一年...
 二十二年...
 二十三年...
 二十四年...
 二十五年...
 二十六年...
 二十七年...
 二十八年...
 二十九年...
 三十年...

宋史新編卷十七

宋史新編卷十八

明南京戶部主事莆田柯維騏編

五行下

淇範木曰曲直木失其性則為妖祥狂咎木冰恒雨服
 妖龜孽雞禍青眚青祥之類皆屬焉
 元祐元年八月杭州民俞舉慶七世同居家園木連理
 政和三年七月玉華殿萬年枝木連理宋世屢有此瑞
 乾德五年合州上青樛木中有文曰大連宋太平興國
 六年瑞安縣民張度解木五片皆有天下太平字慶曆
 三年澧州獻瑞木有文曰太平之道治平初杭州南新

縣民家析柿木中有上天大國字四年汀州進桐木板
二有文曰天下太平熙寧十年惠州柚木有文曰王帝
萬年天下太平政和三年武義縣木根有萬宋年歲四
字宣和二年求州民劉思析薪有天下太平字紹興十
四年虔州民毀欹屋析柱木有文曰天下太平時守臣
薛弼上之方大亂近木妖也淳熙十六年七月晉陵縣
民析薪中有木字曰紹熙五年如是者二是時紹熙猶
未改元其後止五年近木妖也德祐二年正月寶應縣
民析薪中有天太下趙四字
熙寧元年英州因雷震一山梓樹盡枯而爲龍腦價爲

之賤元豐三年六月饒州長山雨木子數畝狀類山芋
子味香而辛土人以為桂子又曰菩提子明道中嘗有
之是歲大稔紹興間漢陽軍有挿榴枝於石罅秀茂成
陰歲有花實者初郡獄有誣服孝婦殺姑婦不能自明
屬行刑者挿髻上華於石隙曰生則可以驗吾冤行刑
者如其言後果生淳熙十六年三月揚州桑生瓜櫻桃
生茄此草木互爲妖也紹熙五年行都雨木與唐志貞
元陳留雨木同占木下植而自上墮將有上下易位之
象嘉定六年五月嚴州淳安遂安桐廬三縣大木自拔
占曰木自拔國將亂景定四年五月成都太祖廟側大

木仆忽起立生三芽

慶曆三年十二月丁巳雪木冰占曰兵象嘉祐元年正月元祐八年二月靖康二年正月竝雪木冰咸平六年十一月大中祥符五年正月天禧五年正月治平二年十月熙寧三年十月八年正月九年正月宣和五年十月七年二月紹興五年十一月竝雨木冰

宣和六年御樓觀燈開封尹設次彈壓於觀下帝從六宮於其上簾幕深密下無由知衆中忽有人躍出黑色布衣類寺僧行童以手畫簾出指斥語帝怒甚傳旨治之箠掠加炮烙詢誰何略不一語亦無痛楚狀又斷其

足筋俄施刀變血肉狼籍帝大不悅為罷一夕之懽竟不得其何人付獄盡之七年八月都城東門外鬻菜夫至宣德門下忽若迷罔釋荷檐向門戟手出悖罵語且曰太祖皇帝神宗皇帝使我來道尚宜速改也邏卒捕之下開封獄一夕方省則不知向者所為者乃於獄中盡之建炎二年十一月高宗在揚州郊祀後數日有狂人具衣冠執香爐攜絳囊拜于行宮門外自言天遣我為官家兒書于囊紙刻於右臂皆是語鞠之不得姓名高宗以其狂釋不問明年二月金人犯維揚三月有明受之變淳熙十四年正月紹興府有狂人突入恩平郡

王第升堂踐王坐曰我太上皇孫來赴郡鞠訊終不語亦狂咎也是冬高宗崩明年八月王薨

治平元年京師自夏歷秋久雨不止摧真宗及穆獻懿三后陵臺靖康元年四月京師大雨天氣清寒又自五月甲申至六月暴雨傷麥夏行秋令建炎三年二月癸亥高宗初至杭州久霖雨占曰陰盛下有陰謀時苗傅劉正彥爲亂紹興四年九月久雨時劉豫連金人入寇十月高宗親征而霽

乾德四年二月長春節甘露降江寧府報恩院五年二月復降江寧玉泉寺松樹開寶元年十二月降蔡州僧

院柏樹太平興國三年正月甘露降壽州廡四年五月降河東縣廡叢竹凡三日七年四月知漢州安守亮獻柏葉甘露一器雍熙元年三月降西京南太一宮新城二年四月降後苑草木四年十二月降興化軍羅漢峯前五松端拱二年二月降壽州廡園柏及資聖寺檜淳化二年十二月資州廡及延壽觀德純寺甘露降松柏凡六日自是迄至道甘露疊降諸州者七咸平元年四月甘露降平戎軍廡果樹九十餘本迄五年甘露降諸州者九景德間甘露降諸州軍者八大中祥符間甘露降玉清昭應宮者一降亳州太清宮者二降諸州軍者

三十六天禧間甘露降後苑及會靈觀玉清昭應宮者各一降諸州軍者十有一天聖元年正月迄嘉祐七年甘露降諸州軍者十有七熙寧元年迄元豐八年甘露降凡二十餘處元祐元年迄元符三年亦如之大觀元年正月甘露降于九成宮帝廩室三年冬降于尚書省及六曹御製七言四韻詩賜執政已下其後內自禁中及宣和殿延福宮神霄宮下至三學開封府大理寺宰臣私第皆有之歲歲拜表稱賀高宗禁獻符瑞在位三十六年史書甘露惟紹興十七年十月降于臨安府十九年四月降于江西路及建康府孝宗以後並不見於

史云

建隆初蜀孟昶末年婦女競治髮爲高髻號朝天髻未幾昶入朝江南自後漢以來民間有服玩侈靡者人詢之必對曰此物屬趙寶子及李煜末年宮中收露水染淺碧爲衣號天水碧趙國姓也寶年號也天水趙之望也後爲王師所克宣和末京師競以鵝黃爲腹圍謂之腰上黃婦人便服不施衿紐束身短製謂之不製衿始自宮掖未幾通國皆服之明年徽宗內禪稱上皇竟有青城之邀不能制金虜也紹興二十一年行都豪貴競爲小青蓋飾赤油火硃於頂硃者乘輿服御飾升龍用

焉近服妖亦僭咎也時去宣和未遠婦人服飾猶集翠羽爲之近服妖也二十七年交趾貢翠羽數百命焚之通衢嚴禁之紹熙元年里巷婦人以琉璃爲首飾唐志琉璃釵釧爲流離之兆理宗朝宮妃繫前後掩裙而長窄地名趕上裙梳高髻於頂曰不走落束足織直名快上馬粉點眼角名淚妝四方皆效之亦北遷之識云大觀元年閏十月丙戌都水使者得兩首龜以爲瑞蔡京信之鄭居中不以爲然帝命棄龜金明池語在居中傳紹興八年五月汴京太康縣大雷雨下冰龜數十里隨大小皆龜形具手足卦文

紹興初陳州民家雞忽人言近雞禍也松陽縣治有雞伏卵毛生殼外亦毛孽也

紹興十六年清遠翁源真陽三縣鼠食稼千萬爲羣時廣東久旱凡羽鱗皆化爲鼠近鼠妖也慶元元年六月鄱陽縣民家一猫帶數十鼠行止食息皆同如母子相哺者民殺猫而鼠舐其血鼠象盜猫職捕司盜廢職之象也與唐龍朔洛州猫虎同占谷中鼠與水出出慶元元年夏建昌軍民居木柱有聲如牛鳴者三日乃止咸淳九年丞相賈似道起復之日方拜家廟忽聞內有裂帛聲衆賓愕然密詢左右知棟裂皆遂巡而退此

與漢霍禹董賢室門自壞同占。洪範金曰從革，金失其性則為變恠，僭咎恒暘詩妖民訛毛蟲之孽，白膏白祥之類皆屬焉。建隆二年七月，晉州神山縣北谷中有鐵隨水流出，方二丈三尺，其重七千斤。太平興國四年九月，夾江縣得黑石二，皆丹文。一云君王萬歲，一云趙三十一帝。咸平四年十一月，京城民獲金牌，有趙為君萬年字。十二月，亳州太清宮鐘自鳴。大中祥符中，舒州獻瑞石，文曰誌公記。政和二年，玄圭始出。晉州上一石，綠色，方三尺餘，當中有文曰堯天正，其字如掌大而端楷，類手畫者。堯

字居右，天正字綴行于左。都堂驗視，龔石三分，而字畫愈明。又於堯字下，隱約出一瑞字，位置始均。蓋曰天正堯瑞云，或謂晉陽堯都也。方玄圭出，乃有此瑞。宣和四年，後御府所藏，往往復變為石，而色類白骨。此與周寶圭占略同。崇寧四年三月，鑄九鼎，用金甚厚，取九州水土內鼎中，既奉安於九成宮，車駕臨幸，徧禮焉。至北方之寶鼎，忽漏水溢于外，其後竟以北方致亂。建炎元年，南京留守朱勝非夜防城，見南門外火光燭地，掘之得銅印，有文曰朱勝私印，火鑠金，金所畏也。後拜相，有明受之變，卒坐貶。三年，吉州修城役夫得髑髏，棄水中，俄

浮一鐘有銘五十六字大略云唐興元年吾子沒瘞廬陵西壘後當火德五九之際世衰道敗浙梁相繼喪亂章貢康昌之日吾亦復出是邦東平鳩工復使吾子同河伯聽命水官郡守命錄其辭錄畢而鐘自碎

慶元二年十二月吳縣金鵝鄉銅錢百萬自飛

嘉定八年春旱首種不入遍禱于嶽瀆至于八月乃雨江浙淮閩皆旱建康寧國府衢婺溫台明徽池真太平州廣德興國南康盱眙安豐軍爲甚行都百泉皆竭淮甸亦然

建隆中京師士庶及樂工少年競唱歌曰五來子自建

隆開寶凡平荆湖川廣江南五國皆來朝周廣順初江南伏龜山圯得石函長二尺廣八寸中有鐵銘云維天監十四年秋八月葬寶公于是銘有引曰寶公嘗爲偈大字書于版帛寡之人欲讀之者必施數錢乃得讀訖卽寡之是時名士陸陞王鈞姚察而下皆莫知其旨或問之云在五百年後至卒乃歸其銘同葬焉銘曰莫問江南事江南自有馮乘雞登寶位跨大出金陵子建司南位安仁秉夜燈東鄰家道闕隨虎遇明興其字皆小篆體勢完具徐鉉徐鉉韓熙載皆不能解及煜歸朝好事者云煜丁酉襲位卽乘雞也開寶甲戌國滅是跨大

也當王師圍其城而曹彬營其南是子建也潘美營其北是安仁也其後錢俶舉國入覲卽東鄰也家道闕意無錢也隨虎遇戊寅也蜀孟昶末年自題桃符曰新年納餘慶嘉節號長春其年正月降宋知成都者呂餘慶長春者聖節名也劉鋹時廣州童謠曰羊頭二四白天雨至宋師所擒之歲乃辛未二月四日也紹定三年都城市井作歌詞末句皆曰東君去後花無主朝廷惡而禁之未幾太子詢薨慶元四年三月甲辰有郵筒置詩達御前者詔宰臣究其詩不錄嘉泰四年越人盛歌鐵彈子白塔湖曲俄有盜金十一者自號鐵彈子繆傳其

鬪死于白塔湖中後獲於諸暨縣云

政和中徽宗有事南郊出南薰門見雲間人物隊仗謂天真示現蓋方士所爲也乃建道觀以迎真爲名後欽宗出南門見金酋實應其讖又是時京師宮觀之名曰通真曰會真曰葆真皆女真之應也又詔修神保觀俗所謂二郎神者京師人素畏之自春及夏傾城男女負土以獻揭榜通衢云某人獻土亦有飾形作鬼使巡門催納土者或以爲不祥禁絕之後幹離不圍京師其國謂之二郎君云宋以周顯德七年庚申得天下圖讖謂過唐不及漢一汴二杭三閩四廣又有寒在五更頭之

謠故宮漏有六更按漢四百二十餘年唐二百八十九年開慶元年宋祚過唐十一年滿五庚申之數至德祐二年得三百一十七年而見六庚申如宮漏之數咸平二年十二月黃州長析村二虎夜鬪一死食之殆半占云守臣災明年知州王禹偁卒咸淳九年十一月辛卯黎明有虎出揚州市色微黑制置使李庭芝占曰千日之內殺一大將於是鬻其肉於城外而厭之紹興六年四月中京大雪雷震犬數十爭赴河死慶元二年撫州有犬若人坐于郡守之坐未幾郡守林廷彥卒宣和七年秋有狐由良嶽直入禁中據御榻而坐紹熙

五年八月揚州獻白兔侍御史章穎劾守臣錢之望以孽爲瑞占曰國有憂白喪祥也是歲光宗崩

至道二年二月丙子夜西方有蒼白氣長短八道如彗掃稍經天漢參錯如交蛇占曰主兵勝景德二年二月丁亥白氣五道貫北斗占爲大風幸臣憂治平三年三月白氣貫紫微極星越兩月乃滅占爲喪祥宣和三年九月壬午夜蒼白氣長三丈貫月主其下有亂者靖康元年十一月乙卯夜白氣出大微時已有金難紹興三十年十二月戊申夜白氣出尾歷心房亢角入天市貫太微至郎位止有類天漢白氣主兵明年虜亮入寇

紹熙五年六月壬寅白氣如帶亘天巳酉亦然喪祥也於是孝宗崩寧宗受禪

建炎二年杜充為北京留守天雨紙錢于營中厚盈寸明日與益人戰城下敗績紙白祥也紹興元年潭州得白玉于州城蓮花池中孔彥舟以獻詔却之前史以為玉變近白祥後彥舟為劇盜

紹興二年宣州有鐵佛像坐高丈餘自動迭前迭却若樞而就人者數日既而郡有火火氣盛金失其性而為變恠也七月天雨錢或從石甃中涌出有輪郭肉好不分明穿之碎若沙土淳熙九年春德興縣民家鏡自飛

舞與日光相射慶元二年正月泰寧縣耕夫得鏡厚三寸徑尺有二寸照見水底與日爭輝病熱者對之心骨生寒後為雷震而碎

洪範土爰稼穡土失其性則為災凶恒風脂夜之妖華孽羸蟲之孽牛禍黃胄黃祥皆屬焉

建炎元年汴京大饑米升錢三百一鼠錢數百人食道殣三年山東大饑時金人陷京東諸郡民聚為盜車載乾尸為糧紹興六年蜀大饑道殣枕藉果州守臣宇文彬獻禾粟九穗圖論者以為導諛坐黜嘉泰四年春撫袁州隆興府臨江軍大饑殍死不可勝瘞有舉家二十

七人同赴水死者嘉定元年淮民大饑流江浙者百萬人是歲行都亦饑二年春兩淮荆襄建康府大饑米斗錢數千淮民刲道殣食盡發瘞繼之人相搯噬流揚州者數千家是秋諸路復大歉冬行都饑殍者橫市道多棄兒德祐二年正月揚州饑民相食

大中祥符二年無爲軍大風拔木摧屋壓者千餘人治平四年正月庚辰朔大風霾是日上尊號廷中仗衛皆不能整時帝已不豫後七日崩熙寧九年恩州武城縣有旋風東南來望之插天如羊角大木盡拔旣而漸近乃經縣城官民舍悉卷入雲中縣令兒女奴婢卷去復

墮地死傷者數人民間死傷亡失不可勝計縣悉爲丘墟靖康二年正月己亥天氣昏暄狂風迅發竟日夜西北陰雲中如有火光長二丈餘濶數尺民時時見之

至道二年秋九月環慶州梨生花占有兵明年契丹擾北邊紹興七年春廣西大饑李實變爲桃十二月中書門下省檢正官張宗元出撫淮西軍寓建康槃冰有文如畫佳卉茂木華葉相敷日易以水變態奇出春暄乃止二十七年四月徽州祈門縣圃桃已實復華淳熙中興化軍仙遊縣九座山古木末生花臭如蘭

政和五年南京野蠶成繭織紬五匹綿四十兩聖繭十

五兩

大中祥符元年、龔丘縣民李起、牛生四犢、判州王欽若圖以獻、政和五年、安武軍牛生麒麟、重和宣和中、屢有乏、紹興元年、紹興府有牛、戴刃突入城市、觸馬裂腹、出腸、時衛卒多犯禁屠牛、牛受刃而逸、近牛禍也、慶元三年、樂平縣田家牛生犢、如馬一角、鱗身肉尾、農以不祥殺之、或惜其為麟、同縣萬山牛生犢、人首、

淳化三年正月、乙卯、京師雨土、占曰、小人叛、自後李順盜據益州、終宋世屢有此異、紹興十八年十一月、壬辰、肆赦、天有雲赤黃、近黃祥也、太史附秦檜旨、奏瑞德祐

元年三月辛巳、終日黃沙蔽天、或曰、喪氛、

乾德五年十一月、許州開元觀老君像自動、六年正月、簡州普通院毗廬佛像自動、元豐元年、邕州佛像動搖、初像動、夏人入寇、又動、而州大火、其後儂智高叛、復動、於是知州錢師孟投其像于江中、

景德元年正月、京師連日地震、契丹入寇、慶曆三年五月、忻州地震、虎翼卒王倫叛、六年夏、河北河東京東同時地震、明年、貝州王則叛、宣和四年、北方用兵、雄州地大震、玄武見於州、正寢有龜大如錢、蛇若硃漆、筋相逐行、宣撫使焚香再拜、以銀奩貯一物、俄俱死、隆興四

年十二月、石泉軍地震三日、聲如雷、屋瓦落、時綿竹有
冤獄、嘉定九年、兩州地大震、累月未幾、金人犯蜀、
雍熙三年七月、癸巳、福津縣有大山飛來、壞民田數百
里、咸平四年正月、成紀縣山摧、壓死者六十餘人、慶曆
六年、登州地震、岨嶠山摧、熙寧五年九月、丙寅、華州少
華山前阜頭峰、越八盤、領及谷摧、陷于石子坡、東西五
里、南北十里、潰散墳裂、湧起堆阜、各高數丈、長若隄岸、
至陷、居民數百戶、竝山之民言、數年以來、峯上常有雲、
每遇風雨、隱隱有聲、是夜初昏、無風雨、忽霧起、有聲漸
大地、遂震動、頃而山摧、紹熙四年、秋、南嶽祝融峯、山自

摧、劔門關山自摧、慶元二年六月、辛未、台州黃巖縣大
雨水、有山自徙、五十餘里、聲如雷、草木冢墓皆不動、而
故址潰為淵潭、時臨海縣清潭山、亦自移、嘉泰二年、七
月、建安縣山摧、壓者六十餘家、嘉定九年、黎州山崩、咸
淳十年、大霖雨、天目山崩、水湧流、安吉臨安餘杭民溺
死者亡算

嘉祐七年三月、徐州彭城濠州鍾離地生麩十餘頃、民
皆取食、元豐三年五月、青州臨朐益都石化為麩、
熙寧元年、荆襄間天雨白鼈、如馬尾、彌漫山谷、宋季屢
有雨毛之異、咸淳九年、江南平地產白毛、臨安尤多、

